

სს „ელექტროენერგეტიკული სისტემის კომერციული ოპერატორი“-ს მიერ ელექტროენერგიის იმპორტის შესახებ ინტერესთა გამოხატვის ჩატარებისა და მასში მონაწილეობის წესები

თავი I

ელექტროენერგიის იმპორტის განხორციელების შესახებ ინტერესთა გამოხატვის გამოცხადების წინაპირობა

1. ინტერესთა გამოხატვის გამოცხადება ხდება ელექტროენერგეტიკული ბაზრის ოპერატორის მიერ ტექნიკური ოპერატორის - სს „საქართველოს სახელმწიფო ელექტროსისტემის“ ოფიციალური წერილის საფუძველზე, სადაც მითითებული იქნება იმპორტის განხორციელების შესაბამისი საანგარიშო პერიოდ(ებ)ი, მოცულობა(ები), იმპორტის შესაძლო მიმართულება(ები), შესაბამისი ელექტროგადამცემი ხაზები და ტექნიკური შეზღუდვები, შესაბამისი მიზეზის მითითებით. აღნიშნული წერილი სს „ელექტროენერგეტიკული სისტემის კომერციულ ოპერატორს“, წარედგინება იმპორტის განხორციელების საანგარიშო თვის დაწყებამდე (რამდენიმე საანგარიშო თვის შემთხვევაში-პირველი საანგარიშო პერიოდის დაწყებამდე) არაუგვიანეს 15 (თხუთმეტი) სამუშაო დღით ადრე.

თავი II

ინტერესთა გამოხატვაში მონაწილეობის წესები და პირობები

მუხლი 1. ზოგადი დებულებანი

1. ინტერესთა გამოხატვას ატარებს სს „ელექტროენერგეტიკული სისტემის კომერციული ოპერატორი“ (შემდგომში „ესკო“) დაინტერესებული პირების მიერ, წინამდებარე წესის მიხედვით, ესკო-სთვის დალუქული კონვერტების წარმოდგენის/გამოგზავნის მეშვეობით.

2. ინტერესთა გამოხატვაში მონაწილეობის უფლება აქვს ნებისმიერ არარეზიდენტ, აგრეთვე, სს „ელექტროენერგეტიკული სისტემის კომერციული ოპერატორი“-ს მიერ იმპორტიორ კვალიფიციურ საწარმოდ დარეგისტრირებულ რეზიდენტ იურიდიულ პირს (შემდგომში „აპლიკანტი“).

3. ინტერესთა გამოხატვაში მონაწილეობის გზით, აპლიკანტს ეძლევა შესაძლებლობა, გააკეთოს შეთავაზება ელექტროენერგიის იმპორტის გამოცხადებული მთლიანი მოცულობის თაობაზე, წინამდებარე დოკუმენტის მე-2 მუხლის მე-2 პუნქტში მითითებული

დოკუმენტაციის ესკო-სათვის წარდგენით. იმპორტის გამოცხადებული მოცულობის მხოლოდ ნაწილზე წარმოდგენილი წინადადება არ განიხილება.

მუხლი 2. ინტერესთა გამოხატვაში მონაწილეობის პირობები

1. შეთავაზება (წინამდებარე მუხლის მე-2 პუნქტში მითითებული დოკუმენტაცია) აპლიკანტმა ესკო-ს უნდა წარუდგინოს:

დალუქული კონვერტით, იურიდიულ მისამართზე, საქართველო, ქ. თბილისი, ბარათაშვილის ქ. №2, 0114, მე-5 სართული, ოთახი №2, საქმისწარმოების დეპარტამენტი.

2. ინტერესთა გამოხატვაში მონაწილეობის მისაღებად აპლიკანტი ვალდებულია:

2.1. ესკო-ს წარუდგინოს ოფიციალური წერილი (ელექტრონული ფოსტის სავალდებულო მითითებით) ინტერესთა გამოხატვაში მონაწილეობის თაობაზე და თან დაურთოს ქვემოთ მოცემული დოკუმენტაცია დალუქული კონვერტით:

ა) ესკო-ს მიერ დადგენილი ფორმით შევსებული და ხელმოწერილი განაცხადი ელექტროენერგიის იმპორტის თაობაზე. განაცხადში იმპორტის ფასი უნდა მიეთითოს აშშ დოლარში;

ბ) ელექტროენერგიის იმპორტის თაობაზე განაცხადზე ხელმოწერი პირის უფლებამოსილების დამადასტურებელი დოკუმენტი;

გ) ამონაწერი შესაბამისი იურიდიული პირის რეგისტრაციის შესახებ, გაცემული უფლებამოსილი ორგანოს მიერ;

დ) არარეზიდენტი იურიდიული პირის შემთხვევაში, შესაბამისი ქვეყნ(ებ)ის ტექნიკური ოპერატორ(ებ)ის წერილობითი თანხმობა საქართველოში ელექტროენერგიის მოწოდების თაობაზე აპლიკანტის მიერ შემოთავაზებული პირობების გათვალისწინებით (ასეთის არსებობის შემთხვევაში);

ე) რეზიდენტი იურიდიული პირის შემთხვევაში, იმპორტის ხელშეკრულება ან შესაბამისი ქვეყნის (საიდანაც იგეგმება ელექტროენერგიის იმპორტი) უფლებამოსილი პირის/კონტრაქტის მიერ დამოწმებული დოკუმენტი იმპორტის განხორციელებასთან დაკავშირებულ განზრახულობათა შესახებ.

3. შეთავაზებების წარდგენის ვადის დასრულების შემდგომ, არაუგვიანეს 2 (ორი) სამუშაო დღის ვადაში, ესკო განახორციელებს აპლიკანტ(ებ)ის მიერ გაკეთებული შეთავაზებების განხილვას, დალუქული კონვერტების გახსნის გზით, რომელსაც დაესწრებიან აპლიკანტ(ებ)ის უფლებამოსილი წარმომადგენლები. დალუქული კონვერტების გახსნაზე დასწრების უფლებამოსილება დადასტურებული უნდა იყოს შესაბამისი დოკუმენტაციით.

3¹. COVID-19-თან დაკავშირებული შეზღუდვების გათვალისწინებით, ინტერესთა გამოხატვაში მონაწილე არარეზიდენტი პირების წარმომადგენლები და სურვილის შემთხვევაში, რეზიდენტი იურიდიული პირების წარმომადგენლებიც, შემოთავაზებების

განხილვას დაესწრებიან ონლაინ, აპლიკაცია ZOOM-ის მეშვეობით, რის შესახებაც მათ წინასწარ წერილობით უნდა აცნობონ ესკოს. ინტერესთა გამოხატვაში მონაწილე აღნიშნულ პირებთან შესაბამისი ბმული გაიგზავნება მათ მიერ დოკუმენტაციასთან წარმოდგენილ წერილში მითითებულ ელექტრონულ მისამართზე.

4. დალუქული კონვერტების გახსნისა და შეთავაზებების განხილვის ზუსტი დრო (დღე, ადგილი და საათი) დაინტერესებულ მხარეებს ეცნობებათ ესკო-ს ვებ-გვერდის მეშვეობით, ასევე შეტყობინების გაგზავნით აპლიკანტ(ებ)ის მიერ მითითებულ ელექტრონულ ფოსტაზე.

5. გამარჯვებულად გამოცხადდება კომპანია, რომლის მიერ იქნება შემოთავაზებული იმპორტის მინიმალური ფასი.

6. ესკო ინტერესთა გამოხატვაში გამარჯვებულ კომპანიას აცხადებს, დალუქული კონვერტების გახსნისა და შემოთავაზებების განხილვიდან არაუმეტეს 2 (ორი) სამუშაო დღისა. აღნიშნულთან დაკავშირებით ინფორმაცია განთავსდება ესკო-ს ოფიციალურ ვებ-გვერდზე და შეტყობინება გაეგზავნება ინტერესთა გამოხატვაში მონაწილე ყველა აპლიკანტს, აპლიკანტ(ებ)ის მიერ მითითებულ ელექტრონულ ფოსტაზე.

7. აპლიკანტი, რომელიც ჩატარებული გამოკითხვის შედეგად გამოცხადდება გამარჯვებულად, უფლებამოსილია, არაუგვიანეს 5 (ხუთი) სამუშაო დღის განმავლობაში გააფორმოს ელექტროენერგიის იმპორტის პირდაპირი ხელშეკრულებ(ებ)ა ნებისმიერ კვალიფიციურ საწარმოსთან. აღნიშნული ხელშეკრულებებით გასაყიდი ელექტროენერგიის ფასი და ჯამური მოცულობა არ უნდა აღემატებოდეს აპლიკანტის მიერ გამოკითხვაში დაფიქსირებულ ფასს და მოცულობას.

8. გამოკითხვაში დაფიქსირებულ ელექტროენერგიის იმპორტის ჯამური მოცულობის შესაბამის ელექტროენერგიას, ან ამ მუხლის მე-7 პუნქტის მიხედვით გათვალისწინებულ, აპლიკანტის მიერ ელექტროენერგიის კვალიფიციურ საწარმო(ებ)ზე რეალიზაციის შემდგომ დარჩენილ მოცულობაზე ესკო აფორმებს შესაბამის ნასყიდობის ხელშეკრულებას გამარჯვებულ აპლიკანტთან.

9. იმ შემთხვევაში, თუ ინტერესთა გამოხატვაში გამარჯვებული კომპანიის მიერ ტექნიკური მიზეზების/შეზღუდვების გამო ვერ მოხერხდება ინტერესთა გამოხატვაში დაფიქსირებული მოცულობის სრულად ან ნაწილობრივ მიწოდება, ესკო უფლებამოსილია, მიმართოს ინტერესთა გამოხატვაში შემდგომი საუკეთესო წინადადების წარმომდგენ კომპანიას (რომელსაც აღნიშნულზე გაცხადებული აქვს წინასწარი თანხმობა ამ მუხლის მე-10 პუნქტის შესაბამისად) განახორციელოს ელექტროენერგიის იმპორტი ინტერესთა გამოხატვაში მის მიერ დაფიქსირებული ფასით.

10. განაცხადის ფორმაში მითითებულია შესაბამისი გრაფა, რომლის მონიშვნით აპლიკანტი აცხადებს მზადყოფნას, რომ იმ შემთხვევაში, თუ რაიმე მიზეზით ვერ გაფორმდება სათანადო ხელშეკრულება გამოკითხვაში გამარჯვებულ კომპანიასთან ან გამარჯვებული კომპანიის მიერ ტექნიკური მიზეზების/შეზღუდვების გამო ვერ მოხერხდება ინტერესთა გამოხატვაში დაფიქსირებული იმპორტი მოცულობის სრულად ან ნაწილობრივ მიწოდება, მომდევნო საუკეთესო წინადადების წარმოდგენის შემთხვევაში, აპლიკანტი მზად არის, გააფორმოს

შესაბამისი ხელშეკრულება და განახორციელოს იმპორტი ინტერესთა გამოხატვაში მის მიერ წარმოდგენილი ფასით.

11. ესკო არ არის პასუხისმგებელი ელექტროენერგიის იმპორტის გრაფიკების დაცვაზე/შესრულებაზე.

12. ესკო, ელექტროენერგიის იმპორტის განხორციელების შესახებ ჩატარებული ინტერესთა გამოხატვის შესახებ ინფორმაციას უგზავნის საქართველოს ეკონომიკისა და მდგრადი განვითარების სამინისტროს და სს „საქართველოს სახელმწიფო ელექტროსისტემას“. ასეთი ინფორმაცია უნდა შეიცავდეს ყველა აპლიკანტის მიერ წარმოდგენილ წინადადებას.

13. დამატებითი შეკითხვების თაობაზე შესაძლებელია დაკავშირება ესკო-ს იმპორტ-ექსპორტის დეპარტამენტთან შემდეგ ელექტრონულ მისამართ(ებ)ზე:

ა) bbuturishvili@esco.ge

ბ) ltelia@esco.com.ge

14. ოფიციალური განაცხადი ესკო-ში წარმოდგენილი უნდა იქნეს ქართულ ან ინგლისურ ენაზე.

15. წარდგენილი შეთავაზებების/განცხადების წინამდებარე წესებსა და პირობებთან შეუსაბამობის შემთხვევაში, ესკო უფლებამოსილია, არ გაეცნოს მას.